

摘藻堂四庫全書薈要

經部

欽定四庫全書薈要

經部

春秋通說卷六

七



欽定四庫全書叢要卷一千四百八十七

經部

春秋通說卷六

宋 黃仲炎 撰

僖公下

十有五年春王正月公如齊

楚人伐徐

楚自名陵之後雖復崛強然兵車徜徉猶未離乎近楚之國也今徐居下邳而臨淮泗於齊魯為近而去

楚遠矣而楚乃遠攻至於徐以撼齊魯若涉無人之境者非大有所侮而然哉書曰無怠無荒四夷來王齊桓霸業既盛而志氣易盈葵丘之後謂中國已無事諸侯已帖服震而矜之於是怠忽荒政之患形焉楚雖夷狄而有智士黠才如屈完者為之謀計窺覘中國是以敢於慢侮而不顧也春秋書楚人伐徐於齊桓晚年荒忽之際其垂戒於後世明矣

三月公會齊侯宋公陳侯衛侯鄭伯許男曹伯盟于牡

丘遂次于匡公孫敖帥師及諸侯之大夫救徐

諸侯在會而使大夫救徐齊侯荒怠之迹可見矣大夫專中國之政蓋自是始也

夏五月日有食之秋七月齊師曹師伐厲八月螽九月公至自會季姬歸于鄆

己卯晦震夷伯之廟

夏侯勝謂漢武帝多殺士衆竭民財力無德澤於民不宜為立廟樂蓋廟以觀德非可苟立也夷伯魯大

夫必有不當廟者故春秋因天變以示戒焉其書已  
卯晦者晦朔之晦爾公穀謂之晦冥非也僖十六年  
戊申朔隕石于宋五成十六年甲午晦晉楚戰于鄢  
陵可以類推矣

冬宋人伐曹

齊桓晚歲不獨平時所忌之國果於抗衡而所厚如  
宋襄亦動伐曹之師蓋欲乘其霸業之衰而代興也  
大抵齊桓之霸成於未忘在莒之時而壞於震矜葵

丘之日一身而二變焉此國勢安危人情離合所由判也後世如唐明皇以憂勤致開元之治而卒以驕盈召天寶之亂者不亦齊桓之類歟

楚人敗徐于婁林

十有一月壬戌晉侯及秦伯戰于韓獲晉侯

案左氏秦之伐晉也晉侯逆秦師使韓簡視師復曰師少于我鬪士倍我公曰何如對曰出因其資入用其寵饑食其粟三施而不報是以來也今又擊之我

怠秦奮倍猶未也公曰一夫不可狃況國乎戰于韓  
原敗之秦獲晉侯以歸夫兵以氣勝氣之餒壯由兵  
之曲直我直彼曲則我氣壯而彼氣餒矣我曲彼直  
則彼氣壯而我氣餒矣晉侯背惠食言以致秦師不  
反已而鬪是已居其曲敵居其直此秦人之氣所以  
倍於晉而晉所以敗於秦也春秋書韓之戰以為氣  
餒而貪戰者之戒明矣哉或問秦西戎也始見于春  
秋宜不以爵氏人名稱之也而書秦伯何哉曰秦守



本爵無吳楚之僭詩採秦風書錄秦誓秦之為中國  
明矣不可以戎狄言也

十有六年春王正月戊申朔隕石于宋五是月六鷁退  
飛過宋都

左氏曰隕星也凡星隕至地即為石隋大業十二年  
有流星隕于吳郡為石本朝治平三年有星隕于義  
興為石以是知隕石者隕星也莊七年書星隕而不  
言石此言隕石而不言星者杜預云彼見星之隕不

見在地之驗此見在地之驗不見始隕之星史各據其實而書之故文異也六鷁退飛者飛而退却之狀也或曰石後數鷁先數二傳以為目治耳治視之察之信乎曰聖人肆筆而書從魯史舊文爾書曰三帛二生一死贊此先數之辭也又曰牛一羊一豕一此後數之辭也豈亦有所謂目耳視察之異哉春秋書五石六鷁大旨謂宋襄無德而圖霸故變異見于國中星象顛墜鷁飛退却喪敗有證而猶不悟卒為泓

之戰敗而死之也後世人主其可睹天戒而不懼哉  
是月者文誤也上書戊申朔此承上文當云日

三月壬申公子季友卒夏四月丙申鄆季姬卒秋七月  
甲子公孫茲卒

冬十有二月公會齊侯宋公陳侯衛侯鄭伯許男邢侯  
曹伯于淮

淮水名也詩云鼓鐘將將淮水湯湯鼓鐘伐磬淮有  
三洲周幽王所以亡也此會于淮得非合諸侯以奉

舟楫之游乎齊桓之志荒矣

十有七年春齊人徐人伐英氏

楚病徐而齊不能治顧遷戮於附楚之國是以有伐厲伐英氏之師所謂室於怒而市於色者也

夏滅項

魯滅之也案左氏公有諸侯之事未歸而取項齊人以為討而止公故聲姜以公故會齊侯于卞據經書夏滅項猶言夏取邾秋取根牟則左氏之說信矣二

傳謂齊滅之而經為之諱者妄也若齊實滅項而經為之諱遂以魯滅之辭書則魯何罪哉

秋夫人姜氏會齊侯于卞九月公至自會

春秋不書齊人止公而書至自會於夫人姜氏會齊侯之下則公之止於齊而見釋於聲姜之請可知矣孟子曰仁則榮不仁則辱觀魯僖之事非不仁而辱者歟

冬十有二月乙亥齊侯小白卒

十有八年春王正月宋公曹伯衛人邾人伐齊

左氏載齊桓公與管仲屬孝公于宋襄公以為太子及管仲桓公卒易牙寺人貂立公子無虧孝公奔宋宋襄公以諸侯伐齊齊人與宋人戰宋敗齊師于觀立孝公而還蓋義兵也何以書曰左氏載事有抵牾難盡從者如云齊桓與管仲屬孝公于宋襄公以為太子是也此非左氏載事之誣乃不能辨誣爾夫當國家未有事變之際而早立嗣子以君父命足矣何

待屬於鄰國之君以召外來之變哉管仲雖不以王道佐其君然非甚愚者何至若是蓋仲之罪特在於不能為其君身後之慮早建嗣子致有後日之亂使宋襄得以乘之而決非屬孝公于宋襄以為太子也凡世之姦人苟欲濟其所欲者必附之於義如欺人孤幼而利其財者必假曰吾受其先世所屬而經理其家焉爾宋襄之謀何以異此蓋宋襄自僖十五年伐曹已有圖諸侯之志幸而齊桓死諸子爭亂無虧

立而孝公奔宋宋襄之得孝公不啻如獲奇貨至寶  
矣於是挾之以伐齊而懼不足以勝也則託之曰是  
齊侯仲父嘗屬此於我也以孝公為先君所命則其  
名正以已為齊侯所屬則其辭順名正辭順雖齊國  
之人亦有不可致詰者幸而戰勝卒立孝公故國史  
書之以為信然而不知宋襄實欲立威攘霸特借孝  
公以挫齊所謂受屬於齊桓管仲者蓋誣死而誑生  
者之辭爾此其為術不待智者而後能知之也左氏



乃受其誣可謂惑矣

夏師救齊五月戊寅宋師及齊師戰于嬴齊師敗績狄  
救齊秋八月丁亥葬齊桓公

齊桓公卒踰年更嬴之戰而後得葬春秋備書之以  
見桓公身後之禍如此其甚也桓公霸諸侯幾四十  
年伐楚卻狄免民於左衽之患及身死在殯五公子  
爭立國內大亂同盟之國攘臂伐之而霸者之澤遂  
斬何哉古之王者由修身齊家而推之治國平天下

蓋其立治有本而施諸外者皆其餘功也是以享國  
長遠而無患若夫霸者惟區區用力於其外而所以  
立其本者不暇講矣故齊桓內行不修嬖寵如夫人  
者六人多愛牽之嗣不早定末年荒怠狎近群小寺  
貂易牙之徒弄權撓政而身歿之禍有必至者矣管  
仲家備三歸無格君之學謂桓公淫欲無害於霸趣  
辦目前而不為百年之計功烈卑陋宜曾西之所恥  
而不為也

冬邢人狄人伐衛

宋師伐齊狄不義宋而救齊以其不能勝也而又挾  
邢人以討從宋之衛是激於義也狄稱人何也以其  
人邢不得不人狄也

十有九年春王三月宋人執滕子嬰齊

夏六月宋公曹人邾人盟于曹南

北杏之會齊霸之首事也雖人心始疑於齊然所致  
者猶有四國也今宋襄圖霸為盟於曹國之南是不

能致曹而乃枉駕以盟曹也曹弱於宋而鄰於宋者  
猶且不服況諸侯乎故曹南之盟所與偕者僅一邾  
人而已寡助如此而以求霸是亾舟楫而涉不測之  
淵未有不死於溺者也

鄆子會盟于邾已酉邾人執鄆子用之

左氏載宋公使邾文公用鄆子于次睢之社司馬子  
魚曰古者六畜不相為用小事不用大牲況敢用人  
乎觀此則知宋襄之惡甚於桀紂矣二傳謂用者扣

其鼻以血社非也孔子曰犂牛之子騂且角雖欲勿用山川其舍諸其言用者祭而已矣蓋夷蠻之俗往往有殺人祭鬼者故左氏謂宋公使邾子用鄆子于次睢之社欲以屬東夷是也

秋宋人圍曹衛人伐邢

冬會陳人蔡人楚人鄭人盟于齊

當人心渙散之際而借無忘齊桓之德之名以糾合諸侯楚人之謀也夷狄爭霸始於此矣春秋不先楚

尊中國抑夷狄也

梁亡

案左氏梁伯好土功亟城而弗處民罷而弗堪則曰  
某寇將至乃溝公宮曰秦將襲我民懼而潰秦遂取  
梁是梁伯益其國而不能實亟城弗處以罷其民民  
罷而潰則國已亡矣國亡而後秦取其地非因秦取  
之而後亡也故春秋不得言秦取而以自亡為文焉  
明自亡者民亡之也然則世之人君務廣地而不修

德設險而不得民封疆雖拓城池雖壯而百姓離散  
不足與守之者可無鑒於此哉是以秦皇帝兼并天  
下東城北築雄據關中負百二山河之勢而德政不  
修海內愁困民不勝敝遂起而亡秦故秦之亡亦以  
民焉秦亡於民而後漢取之非因漢取之而亡也亦  
梁亡之類也

二十年春新作南門

新作者不因傾壞徒欲新義而改作也魯人為長

府閔子騫曰仍舊貫如之何何必改作孔子曰夫  
人不言言必有中是知聖人不欲勞其民於無益  
之務也魯僖公嘗修泮宮作新廟矣而春秋不書  
蓋為宮廟以事祖考獻戎功魯人頌之殆有國者  
不可廢故不書也新作南門新延廢皆所不必務  
者是以惡而書之也故曰春秋之紀事為戒而已  
矣

夏郚子來朝



五月乙巳西宮災

西宮者公羊謂之小寢穀梁謂之閔宮從公羊之說則經何以不書小寢如薨于小寢之類從穀梁之說則經何以不書閔宮如立場宮之類而曰西宮何也杜預曰公別宮也蓋公宮之外更為宮於西如後世所謂離宮別館者以其踰乎舊制故春秋因災變而書之以為戒也

鄭人入滑秋齊人狄人盟于邢冬楚人伐隨

二十有一年春秋侵衛

宋人齊人楚人盟于鹿上

宋人為鹿上之盟以求諸侯於楚則是欲藉楚之力以合諸侯也首足倒置至此極矣後世人君有苟圖得志於中國而不恥於事夷狄如唐高祖之於突厥石晉之於契丹者皆宋襄之徒歟

夏大旱

春秋或言不雨或言旱或言大旱何也不雨之害比

旱為輕大旱之害比旱為重也

秋宋公楚子陳侯蔡侯鄭伯許男曹伯會于孟執宋公以伐宋

宋襄公求諸侯於楚而與之為會不虞楚人之詐而執已也可謂甚愚而貪無德而求諸侯以自貽伊慼者矣楚子執宋公而不書楚執者抑夷狄存中國也冬公伐邾

楚人使宜申來獻捷

捷者宋捷也齊捷我以中國而捷戎狄可以言捷也  
故曰戎捷楚捷宋以夷狄而捷中國不可以言捷也  
故不曰宋捷其不曰宋捷者不忍言宋也愛中國之  
道也

十有二月癸丑公會諸侯于薄釋宋公

會于薄釋宋公者蓋諸侯請于楚而釋之也操縱在  
楚也其不曰楚釋而以諸侯自釋為文者存中國也  
二十有二年春公伐邾取須句夏宋公衛侯許男滕子

伐鄭秋八月丁未及邾人戰于升陘

冬十有一月己巳朔宋公及楚人戰于泓宋師敗績

宋襄公自執滕用鄆以失人心而反求諸侯於楚孟  
之會為楚所執辱使諸侯請於楚而後釋之人心既  
離國勢方挫楚宋之不敵已不待識者之見今乃不  
量力而鬪以僥倖於萬一其衆敗身夷也不亦宜乎  
蘓軾氏以宋襄比王莽謂其執鄆子用於次睢之社  
若犬豕然此而忍為之天下孰有不忍者耶泓之戰

乃欲以不重傷不禽二毛不鼓不成列欺諸侯人能  
紆其兄之臂以取食而不能忍於壺飧者天下必知  
其不情也信矣

二十有三年春齊侯伐宋圍絳

宋襄公乘齊桓之喪伐齊以立威故齊孝公亦乘宋  
襄之敗伐宋以修怨蓋出乎爾者反乎爾者也

夏五月庚寅宋公茲父卒秋楚人伐陳冬十有一月杞  
子卒

二十有四年春王正月夏狄伐鄭秋七月

冬天王出居于鄭

襄王不聽富辰之諫道狄以伐鄭既又納狄女為后  
醜其行而廢之狄人怨之故王子帶因之挾狄師以  
伐周王出適鄭處于汜書曰天王出居于鄭以為後  
世人主違忠諫之言啓異類之侮者之戒焉其云出  
者自國都而出也其曰居者明天下皆王居也

晉侯夷吾卒

二十有五年春王正月丙午衛侯燬滅邢

諸侯滅人之國多矣未有書名者而衛侯獨名三傳皆謂惡滅同姓故名之也夫異姓之不可滅猶同姓之不可滅爾况晉滅虢齊滅紀楚滅夔皆同姓而未嘗名也苟以為惡衛侯而名之則晉齊楚皆無惡乎杜諤謂春秋上書衛侯滅邢而傳寫者見下文衛侯燬卒遂誤增其名爾

夏四月癸酉衛侯燬卒



宋蕩伯姬來逆婦

禮未有姑而逆婦者也宋蕩伯姬來逆婦非禮可知  
矣

宋殺其大夫秋楚人圍陳納頓子于頓葬衛文公冬十  
有二月癸亥公會衛子莒慶盟于洮

二十有六年春王正月己未公會莒子衛甯速盟于向  
齊人侵我西鄙公追齊師至鄆弗及

春秋書追有二莊公追戎與此追齊爾然莊公之追

戎也不先言戎侵伐我者戎不犯魯也不犯魯而追之是無寇而生事也僖公之追齊也先言齊人侵我者見齊已寇魯也縱其已寇而後追之是兵不素脩也無寇而生事故追于濟西不言其所止兵不素脩故言至鄆弗及見其懼而弗敢及也夫善為國者靜而能安動而能強靜而不能安則自敝而疲民動而不能強則自歎而畏敵故漢武帝窮征宛漠空竭海內則靜而不能安者也即經書公追戎于濟西是也

文帝歲苦遘患師出無功則動而不能強者也即經  
書公追齊師至鄆弗及是也此可為有國者戒矣  
夏齊人伐我北鄙衛人伐齊

公子遂如楚乞師

千乘之國兵不素備一旦有倉卒之警則乞諸其鄰  
已非立國之道矣況乞師於荆蠻也哉引荆蠻以鬪  
同室非義也示弱於楚人以啓其輕中國之志非謀  
也故書曰公子遂如楚乞師以為後世失義與謀者

之戒焉

秋楚人滅夔以夔子歸冬楚人伐宋圍繆公以楚師伐齊取穀公至自伐齊

二十有七年春杞子來朝夏六月庚寅齊侯昭卒秋八月乙未葬齊孝公乙巳公子遂帥師入杞

冬楚人陳侯蔡侯鄭伯許男圍宋

楚人圍宋而四國從之助夷狄以虐中國也春秋爵四國而人楚者四國之君親至而楚子不親將也

十有二月甲戌公會諸侯盟于宋

二十有八年春晉侯侵曹晉侯伐衛

侵曹伐衛兩舉晉侯而不言遂者蓋晉既侵曹更謀伐衛非以侵曹之師遂加之衛故兩言之也曹衛楚之與也晉欲討楚必先討曹衛義也何以書蓋文公名為討曹衛附楚之罪然實以雪其不禮於晉公子之憾爾湯一征自葛始為匹夫匹婦復讐也豈以報己之私憾哉齊小白過譚譚不禮焉及得國而遂滅

譚其與晉文侵曹伐衛之事一耳故曰五霸者三王之罪人也

公子買戍衛不卒戍刺之

晉強非公子買所能抗不卒戍衛非買之罪也而刺之濫殺大夫也不言殺而言刺內辭也

楚人救衛三月丙午晉侯入曹執曹伯畀宋人

夏四月己巳晉侯齊師宋師秦師及楚人戰于城濮楚

師敗績

晉文公城濮一戰大挫楚鋒不惟立濟霸業而南郢之兵自是不窺中國者久之比齊桓盟召陵之明年而楚遂稱兵弦許無所忌憚優劣相遠矣何以書曰春秋正其誼明其道而已矣功利不與也齊桓無王命而專征卒不以侵陵問楚聖人以王道律之誠有罪矣然齊桓必先得諸侯而後加師于楚氣象雍容奉辭而致討以直情使人未有他技巧也至晉文乃欲因挫楚以霸諸侯成功於期月於是奇謀詭計無

所不用矣當宋被楚兵而告急於晉晉侯曰宋人告急舍之則絕告楚不許我欲戰矣齊秦未可若之何先軫曰使宋舍我而賂齊秦藉之告楚我執曹君分曹衛之田以賜宋人楚愛曹衛必不許也喜賂怒頑能無戰乎又曰楚有三施我有三怨怨讐已多將何以戰不如私許復曹衛以攜之執宛春以怒楚既戰而後圖之凡先軫所以為文公謀者皆詭道也晉文卒用其計故能合齊秦之力堅宋人之志攜曹衛之



心而挑子玉以速戰雖荆楚頓挫霸業亟成而人謀

益以黠世變益以下矣故孔子曰晉文公譎而不正

齊桓公正而不譎正之為言猶直也聖人合二霸而

論之若曰齊桓雖為有罪然較諸晉文之譎則猶直

爾自晉文以譎濟霸圖而後世之君臣凡求得志之

速勝敵之驟者咸祖之巧詐百出機穽橫生化生人

為鬼魅使天下不得休息可勝嘆哉惟蜀諸葛亮用

兵行師本於仁義不用詐謀如魏延每隨亮出輒欲

請兵萬人與亮異道會于潼關亮制而不許又欲請  
兵五千循秦嶺而東直取長安以為一舉而咸陽以  
西可定而亮亦不從蓋亮之規摹直欲以數十萬衆  
據正道而臨有罪建旗鳴鼓直指魏都豈肯翳行竊  
步事一旦之譎以窺咸陽哉斯可謂明春秋之義矣  
楚殺其大夫得臣

得臣楚子玉也城濮之戰子玉實為主帥貪戰而敗  
見戮于國宜也何以書蓋聖人借楚以垂戒也自古

人君用兵致敗不自引咎類皆歸罪于謀臣主帥而誅之以快敵國之意者未有能復振者也惟秦穆公以殽陵自責卒赦孟明魏司馬昭引二敗以罪已悉宥諸將故能使人心愧悅轉敗為功況楚殺得臣而晉文為之深喜則知得臣者固晉文之所忌也國有人才使敵國望而忌之庸可殺乎今楚殺之以快敵君子是以知楚之無能為也

衛侯出奔楚

五月癸丑公會晉侯齊侯宋公蔡侯鄭伯衛子莒子盟于踐土陳侯如會

齊桓既歿諸侯之所畏者楚而已一戰勝楚則諸侯將焉往哉故踐土之盟八國驟集若執券而取諸鄰者威驅勢迫之效非天下心悅而誠服也

公朝于王所

公朝于王是也朝于王所非也蓋晉文致王于踐土而因以諸侯朝之也齊桓自北杏創霸垂三十年而

後有定王世子于首止之事蓋前乎首止雖直為僭  
竊而非挾天子以令諸侯也晉文入國之初即謀定  
襄王既勝楚即作王宮于踐土以諸侯見名為尊周  
實挾天子以令諸侯爾蓋其規摹由先軫教之曰求  
諸侯莫如勤王諸侯信之且大義也志在求諸侯於  
是託勤王之義以信服之如曹操挾獻帝以爭天下  
名為漢相實漢賊爾故曰晉文公譎而不正齊桓公  
正而不譎

六月衛侯鄭自楚復歸于衛

晉文廢衛侯而立叔武故踐土之會稱衛子是也衛侯因楚以歸而殺叔武不書不罪其殺也孔子善夷齊則叔武之義宜赦死不立而已公羊子曰叔武辭立而他人立則恐衛侯之不得反故於是已立然後治反衛侯非也如公羊之言是教貪奪者為自文之說也使衛侯終不利其國而長往則叔武將何辭乎故觀春秋則知高廟正刑辟於邦昌之偽立不為過

矣

衛元咺出奔晉陳侯款卒秋杞伯姬來公子遂如齊

冬公會晉侯齊侯宋公蔡侯鄭伯陳子莒子邾子秦人  
于溫

晉文公踐土之盟使衛之臣奪君位溫之會使陳之  
孤奪父喪蓋急功利者至於亂人父子君臣之義而  
不顧也故曰五霸者三王之罪人也

天王狩于河陽

晉重耳自踐土作王宮邀致天子至溫之再會天子猶在焉蓋自夏徂冬歷三時之間使瑯旒黃屋役役於道塗以為已號令諸侯之柄則重耳不臣之罪可勝誅哉左氏述晉侯召王以諸侯見而經不顯言召王者明為臣子不忍直斥至尊之辱也其曰天王狩于河陽者蓋天王因為晉侯所致而從獸于河陽也王之末王亦已甚矣溫即河陽也揔衆地曰河陽指一地曰溫



壬申公朝于王所

晉人執衛侯歸之于京師衛元咺自晉復歸于衛

衛元咺訟衛侯于晉晉為之執衛侯而歸元咺是抑君而臣是助也三綱五常之理熄矣

諸侯遂圍許曹伯襄復歸于曹遂會諸侯圍許

二十有九年春介葛盧來

介葛盧來遠人服也何以書春秋之義不以夷狄煩中國也魯僖有喜大好名之心而事不務實如詩頌

蠻夷率服可見矣介葛盧來公不在國豈無辭以卻之哉饋之芻米期其再至是欲沽服遠之名而已他日侵蕭之禍魯實啓之也唐太宗時高昌王麴文泰入朝西域諸國咸欲因文泰納貢魏徵力諫以為夷國入貢勞敝邊民非中國之利信矣哉

公至自圍許

夏六月會王人晉人宋人齊人陳人蔡人秦人盟于翟泉

王人王子虎也晉人宋人齊人陳人蔡人秦人列國  
之大夫也以大夫敵王人則諸侯敵王矣

秋大雨雹冬介葛盧來

三十年春王正月夏狄侵齊秋衛殺其大夫元咺及公  
子瑕衛侯鄭歸于衛晉人秦人圍鄭介人侵蕭  
冬天王使宰周公來聘

聘諸侯非正也況三公兼冢宰乃坐而論道王朝之  
大臣至貴重者也其可薦幣於諸侯之庭乎

公子遂如京師

凡書大夫如京師者見諸侯不朝而聘也

遂如晉

公子遂受命而如京師不受命而如晉故曰遂如晉其遂如晉者私事大國以求專其國也

三十有一年春取濟西田

左氏謂取濟西田分曹地也濟西本曹地晉文討曹分其地以與魯是魯得於晉賜而非以力取之也何

以書曰曹非天討而被削地之誅魯非王命而受加地之賞奪彼與此徒出於晉人之私而已矣

公子遂如晉

夏四月卜郊不從乃免牲猶三望

戴禮明堂位謂成王以周公為有勲勞於天下於是封周公于曲阜地方七百里革車千乘命魯公世紀周公以天子之禮樂是以魯君孟春乘大路戴弧韞旂十有二旒日月之章祀帝于郊配以后稷天子之

禮也未言魯相傳久矣君臣未嘗相弑禮樂政俗未嘗相變也此皆漢儒夸語爾魯弑三君初稅畝作丘甲政逮於大夫豈得為君臣未嘗相弑禮政未嘗相變哉即此觀之則前所言成王以天子之禮樂賜周公而魯公得用之皆不足信矣程氏說易之師有曰居周公之位則為周公之事由其位而能為者皆所當為也豈有為人臣所當為之事而可用人臣不得用之禮樂哉蓋當周衰之時諸侯僭天子非一國矣

齊桓欲封禪晉亦郊鯨魯郊祀后稷以配天皆僭禮也聖人以為書之不可勝書故特舉其非時災變卜不從者併為後世戒也所謂非時者禮曰三王之郊一用夏正孟獻子曰郊祀后稷以祈農事也故啓蟄而郊郊而後耕蓋啓蟄之時則夏正建寅之月周之三月也經無書三月郊者蓋得時則不書也其以四月五月九月郊則書之所謂災變者郊牛之口傷鼷鼠食牛角牛死之類是也然則何以或言牛或言牲

禮養牲必在滌三月先郊之三月卜牛得吉而養之

三月始成牲也故經於正月則書牛如宣三年正月  
郊牛之口傷改卜牛牛死乃不郊之類是也正月牛  
方在滌未得為牲也於四月則書牲如僖比年夏四  
月四卜郊不從乃免牲之類是也牛在滌三月已成  
牲也所謂卜不從者禮百神之祭不卜而郊獨卜以  
其最大也卜之道三卜當郊之月上辛中辛下辛爾  
孫覺謂月三旬之辛是也過乎三卜則非禮矣天心



不享故卜不從也三望者先儒謂分野之星非也虞  
典稱望秩于山川楚昭謂江漢睢漳楚之望也而未  
嘗及分野之星也禮天子祭天諸侯祭土天子有方  
望之事無所不通諸侯山川凡不在其封內者則不  
祭魯之三望必有出乎封域之外者故悉數之也

秋七月冬杞伯姬來求婦

昔杞伯姬來朝其子是子未為君而挾之以朝也今  
杞伯姬來求婦是婚非使幣而苟焉以成也其悖禮

甚矣

狄圍衛十有二月衛遷于帝丘

春秋書遷有二義曰某人遷某者惡在遷之者也其  
曰某遷于某者惡在自遷者也自遷者猶可以無遷  
也夫國無小道用之則存不道用之則亡傳曰諸侯  
有道守在四鄰夫何遷之有不知出此而惟偏是畏  
惟地利是擇偏者無已則遷者亦將無已是徒勦民  
而已非善為謀也周有西戎之難以東遷而遂衰楚

有群蠻之叛以不徙而復振故經書衛遷于帝丘其  
垂戒於後世明矣

三十有二年春王正月夏四月己丑鄭伯捷卒衛人侵  
狄秋衛人及狄盟冬十有二月己卯晉侯重耳卒

三十有三年春王二月秦人入滑齊侯使國歸父來聘  
夏四月辛巳晉人及姜戎敗秦師于殽

秦穆公違忠臣之諫而動無名之師千里襲人不知  
人之得乘其後匹馬隻輪殄滅無反春秋諸侯用兵

之謬未有如秦之敗于殽者也然晉之敗秦亦有三  
罪背惠一也君喪在殯而主乎戰二也兵以詐勝三  
也晉文公之得國也秦納之其敗楚也秦助之其會  
諸侯也秦無役之不與焉是秦施德于晉也圍鄭之  
役秦背晉而盟鄭子犯請擊之公曰不可微夫人之  
力不及此是文公之深德秦也文公即世雖敵惠不  
在後人而先志可忘乎禮喪不貳事有服金革而無  
避者蓋以寇在門庭國之存亡所係也魯伯禽服喪

之日徐夷並興東郊不開事勢迫切而征築同舉此  
蓋有不可一朝居之患不得已而然者秦師之襲鄭  
也孟明聞鄭有備曰圍之不可攻之不克遂滅滑而  
還是秦自滅滑無關晉事且秦既旋師而晉之疆場  
固無恙也非有背君父之喪無臣子之感也春秋之  
法凡兵以詐勝者曰敗某師秦師還晉及姜戎要擊  
之蓋姜戎素居西戎諳熟秦事上下山阪技與秦同  
於是借為犄角出其不意扼之于殽陵險隘之間雖

幸而勝秦非用兵之正者矣或曰襄公欲紹文之業不得不借強秦以立威強秦敗則列國不敢侮矣故先軫曰一日縱敵數世之患也且兵貴奇勝聖人惡之何哉曰春秋正其誼明其道而已矣功利不與也夫兵以奇勝者孫武之術豈聖人之教哉

癸巳葬晉文公狄侵齊公伐邾取訾婁秋公子遂帥師伐邾晉人敗狄于箕冬十月公如齊十有二月公至自齊

乙巳公薨于小寢

小寢非正也男子不絕於婦人之手以正終也

隕霜不殺草

經書隕霜二一曰隕霜不殺草一曰隕霜殺菽蓋周之十二月夏之十月也霜當殺草而不殺草異也周之十月夏之八月也未當隕霜而殺菽亦異也

李梅實

李梅冬實物反常矣

晉人陳人鄭人伐許

春秋通說卷六



欽定四庫全書薈要卷一千四百八十八

經部

春秋通說卷七

宋 黃仲炎 撰

文公

元年春王正月公即位二月癸亥日有食之

天王使叔服來會葬

桓王崩七年而後葬見諸侯不恤天子之喪也僖公以夏四月葬而王使叔服先二月至魯見天子急於

奉諸侯之喪也冠屨倒置至此極矣

夏四月丁巳葬我君僖公

天王使毛伯來錫公命

天子錫諸侯者三諸侯終喪入見則有錫如禮所謂喪畢以士服見天子已見賜之黻冕圭璧然後歸是也諸侯歲時來朝則有錫如詩所謂君子來朝何錫與之雖無與之路車乘馬又何與之元衮及黼是能敵王所愾則有錫如詩所謂彤弓召兮受言藏之

我有嘉賓中心貺之鍾鼓既設一朝饗之是也魯桓以篡弑得國王不能討更追錫之王之失道甚矣若夫文公成公皆非終喪入見與歲時來朝敵愾而獻功者而王錫命之是恩禮之妄施也

### 晉侯伐衛

左氏載晉文公之季年諸侯朝晉衛成公不朝故襄公既祥使告于諸侯而伐衛先且居曰效尤禍也請君朝王臣從師晉侯朝王于溫經不書朝王而書伐

衛者朝王正也伐衛不正也春秋之紀事為戒而已  
矣故書其不正者不書其正者也伐衛之為不正何  
也不務德而務兵也

叔孫得臣如京師

衛人伐晉

衛人以小加大不量力也

秋公孫敖會晉侯于戚

魯以公孫敖會晉侯政在大夫也

冬十月丁未楚世子商臣弑其君頤

唐太子宏受春秋於率更令郭瑜至楚世子商臣弑其君喟然廢卷曰聖人垂訓何至此耶瑜曰孔子作春秋善惡必書故商臣之罪千載不滅宏曰然所不忍聞願讀他書嗚呼此不特太子宏不知春秋而郭瑜所對亦豈知春秋者哉世有不辨五音而借聽於聾者太子宏之於郭瑜是也夫亂臣賊子有內蓄姦謀外務掩覆如晉盾許止之類固以書名史冊為懼

矣若其直情徑行敢犯大惡如楚商臣者即梟獍蝮  
蜥惟噬嚙是逞何暇懼夫千載不滅之名哉然春秋  
所以書者正以明其為禍之慘使世之為君父者知  
所謹戒以務絕其萌焉爾易曰臣弑其君子弑其父  
非一朝一夕之故其所由來者漸矣由辨之不早辨  
也楚商臣之禍由楚子頤之不早辨也楚子頤之不  
早辨何也夫為世子立師傅是世子之德所待以成  
者也師傅之邪正而世子之善惡分焉故世子與正

人居不能不正猶生長於齊而不能不齊言也與不正者居不能無不正猶生長於楚而不能不楚言也商臣逢目而豺聲固為忍人然觀其一日弑逆之事皆出其師潘崇之謀則其平日之所見聞薰染者可知矣是則商臣之惡不得專為氣質之咎也師傅非人而君不早辨此亂之所由作歟嗚呼使郭瑜而知此必足以祛世子宏之惑矣

公孫敖如齊

二年春王二月甲子晉侯及秦師戰于彭衙秦師敗績秦穆公反自殽陵悔過自誓未幾尋怨再致彭衙之衄是雖悔其非而未嘗改也悔而不改何取於悔哉晉襄得志於殽可以已矣當秦兵再至則修文告以郤之若魯展禽所以犒齊師者秦必愧而反矣不此之圖而逞志於再戰是則晉襄之罪也蓋秦穆憤於敗而不能平晉襄狃於勝而不能屈血氣用事而無理義以養其心終於稔怨結仇黷武殘民而已春秋



書秦晉之戰所以為世之不能懲忿窒慾者之戒嚴  
矣哉

丁丑作僖公主

穀梁子云喪主於虞吉主於練作僖公主後也是不  
然春秋書作者初始也如作丘甲作三軍蓋前此未  
有而今始初也禮虞主用桑練主用栗其狀正方其  
寸尺則有天子諸侯之異作僖公主必有越乎常度  
者故書也

三月乙巳及晉處父盟

夏六月公孫敖會宋公陳侯鄭伯晉士穀盟于垂隴  
晉士穀會盟諸侯晉政在大夫也

自十有二月不雨至于秋七月

僖公三時不雨必特舉三首月此則歷時而數何也  
蓋僖三十三年閒久不雨纔一見而已故詳言之文  
十八年閒久不雨者凡三見焉故從省文也穀梁子  
以為閔雨不閔雨者妄也

八月丁卯大事于大廟躋僖公

大事于大廟者吉禘也未除喪而吉禘非禮也其不  
曰吉禘而曰大事者禘者審諦昭穆之謂也今行逆  
祀躋僖於閔上以臣先君故不得云禘也以此垂戒  
而後世猶有以恭陵而在康陵之上先後相踰失其  
次序如東漢之君者

冬晉人宋人陳人鄭人伐秦

公子遂如齊納幣

使大夫納幣禮也何以書或曰惡居喪而圖婚也是  
不然案魯以此年十一月當除喪若納幣在十一月  
以前則為喪娶在十二月則否今春秋槩以納幣繫  
於冬時之下不明其為十一月與十二月者則知聖  
人所惡不在喪娶矣或又謂若使納幣在十二月喪  
事甫畢而遽圖婚亦有所未安者是亦不然魯人有  
朝祥莫歌者子路笑之孔子曰由爾責於人終無已  
夫聖人酌人情之平不應既除喪而更以喪娶為罪

也然則何以書趙子謂婚禮不當使公族貴遠嫌也故魯公子遂宋公孫壽納幣然後書之

三年春王正月叔孫得臣會晉人宋人陳人衛人鄭人伐沈沈潰

夏五月王子虎卒

外諸侯之大夫卒必有赴于魯者而經不書不以大夫同於諸侯也王朝之卿卒赴則書尊王朝也

秦人伐晉秋楚人圍江

雨螽于宋

春秋書外國之灾有因弔問而知之者有聞而知之者宋大水公使弔焉是因弔問而知之者也六鷁退飛隕石雨螽之類非弔問也特聞而知之爾雨螽者自上而下者也如漢建武中陳留雨穀如稗實隋大定中京師雨毛如馬尾者皆自上而下也物自上而下者異也雨螽為甚矣

冬公如晉十有二月己巳公及晉侯盟

晉陽處父帥師伐楚以救江

城濮之役晉車七百乘輔以宋齊秦三大國之師蓋  
僅而勝楚今以一大夫將偏師而伐之何易歟此非  
晉之君臣敢於易楚也蓋其意謂楚方圍江而吾不  
能救則無以為盟主必救之而憚於合諸侯於是姑  
出偏師以存救江之名而已故陽處父之師不徑以  
赴江之急而迂其途以抵方城之外於是號于人曰  
吾伐楚所以救江也且自秋圍江而晉逮冬遣救兵



由他道遲徊數月間楚師已下江城久矣夫非有救  
患分災之實而竊其名以欺天下不忠莫甚焉

四年春公至自晉

夏逆婦姜于齊

逆婦而不言逆者之名蓋微者也古者冕而親迎猶  
以為輕春秋諸侯但使卿行已非禮矣況微者乎王  
通氏曰婚禮廢天下無家道矣

狄侵齊秋楚人滅江晉侯伐秦衛侯使甯俞來聘



冬十有一月壬寅夫人風氏薨

成風僖公之母莊公之嬖也死而稱夫人葬而稱小君所謂並后耦嫡亂之本也惠公仲子亦以妾亂正也而不稱夫人是當時猶不以夫人稱之也今以夫人稱成風則已甚矣或曰子為君而不得尊其母可乎曰為人子以所當得者加於其親而親安之則孝在是矣苟以其所不當得者加於其親使其親無以安之可謂孝乎

五年春王正月王使榮叔歸含且貽三月辛亥葬我小君成風王使召伯來會葬

榮叔之貽成風猶宰咺之貽仲子也召伯會葬抑又甚矣

夏公孫敖如晉秦人入郛秋楚人滅六冬十月甲申許男業卒

六年春葬許僖公

夏季孫行父如陳秋季孫行父如晉

春秋書內大夫出聘者其旨有四有書以見簡禮者有書以見諄禮者有書以見大夫專命者有書以見大夫私行者所謂簡禮者公孫遂如京師叔孫得臣如京師之類是也諸侯不朝而使大夫聘也諄禮者季孫行父如晉繼於公孫敖如晉之明年之類是也使幣頻煩而不知節也大夫專命者公子遂叔孫得臣如齊之類是也非君命而行也大夫私行者公子友如陳公孫茲如牟季孫行父如陳之類是也蓋公

子友以原仲之舊而茲行父以娶婦之故於是託君命以遂其私也

八月乙亥晉侯驩卒冬十月公子遂如晉葬晉襄公晉殺其大夫陽處父晉狐射姑出奔狄

閏月不告月猶朝于廟

自文公怠棄時政以閏月為非常月而廢告月之禮漸致其後雖常月亦不告矣此子貢所以欲去告朔之餼羊也

七年春公伐邾三月甲戌取須句遂城郛

齊靈公與臧紇言伐晉臧紇對曰抑君似鼠夫鼠晝  
伏夜動不穴於寢廟畏人故也今君聞晉之亂而後  
作焉非鼠而何觀魯文公聞晉難而伐邾取邑是亦  
臧紇之所謂鼠者爾

夏四月宋公王臣卒宋人殺其大夫

戊子晉人及秦人戰于令狐晉先蔑奔秦

案左氏晉襄公卒靈公少晉人以難故欲立長君故

趙盾使士會先蔑如秦逆公子雍先蔑之使也荀林父止之曰夫人太子猶在而外求君此必不行不聽既而趙盾與大夫皆患穆嬴乃背先蔑而立靈公以禦秦師故令狐之戰先蔑奔秦大抵平其心以觀天下之故則是非利害未嘗不甚明一或錮於貪欲之私則如逐鹿者不見泰山矣觀荀林父之戒先蔑者平心之言也故卒不逃其所料惟先蔑之意在於覬覦立君之功而不暇擇焉將以求福乃更得禍此可

為行險者之戒矣

狄侵我西鄙

秋八月公會諸侯晉大夫盟于扈

晉大夫者蓋趙盾也趙盾夾輔幼君以靖晉國之難攝主齊盟使不失霸業可謂有功於國家者矣扈之盟何以書蓋盾內專廢置人主外專盟諸侯非人臣所得為者此而不治則僭攘之禍接踵於後世矣漢史嚴延年劾奏霍光擅廢立無人臣禮雖寢不報而

朝廷肅然敬憚焉夫霍光輔漢功不細矣而延年至以無臣禮劾之漢史以朝廷敬憚稱之豈非有得於春秋之義哉

冬徐伐莒公孫敖如莒莒盟

八年春王正月夏四月秋八月戊申天王崩

冬十月壬午公子遂會晉趙盾盟于衡雍

春秋大夫之專國者未有不外結強援以自固者也公子遂會晉趙盾盟于衡雍其姦謀可見矣



乙酉公子遂會雒戎盟于暴

伊洛瀍澗中原之近境而謂之雒戎者蓋戎居其間也案左氏僖二十二年秦晉遷陸渾之戎于伊川宣三年楚伐陸渾之戎遂至于雒觀兵于周疆蓋成周伊雒之地往往皆戎居之故聖人惡而書之為後世華戎雜處之戒也自此義不明而後世有因匈奴日逐之至而建南廷以安納之如漢世祖者矣徙武都之氏以實關輔如魏太祖者矣故其遺禍至於西晉

大率中原日以多事而紛爭之亂起矣此春秋之學所以不可不講也

公孫敖如京師不至而復丙戌奔莒

觀遂之專敖之恣則文公之不能制其臣可知矣

螽

宋人殺其大夫司馬宋司城來奔

宋昭公立二年間大夫之見殺者再奔者一或由強宗犯公室如前年穆襄之族帥國人以攻公殺公孫

固公孫鄭故書曰宋殺其大夫是也或以婦人奸國  
政如此年襄夫人因戴氏之族殺司馬公子卬逐司  
城蕩意諸故書曰宋殺其大夫司馬宋司城來奔是  
也蓋紀綱不立政權紛亂則君臣不能相保且仕於  
亂邦濫嬰戮辱非君子見幾之道也垂戒之義明矣  
大夫書官而不名史略文也

九年春毛伯來求金

夫人姜氏如齊

婦人歸寧常事也何以書趙子曰無父母而歸寧非禮也

二月叔孫得臣如京師辛丑葬襄王

公子遂如晉葬晉襄公叔孫得臣如京師葬襄王是夷天子於諸侯也況自文公即位以來王再遣使會僖公成風之葬今天王崩魯不得不一報禮公孫敖將命而逃至於踰時然後叔孫再往又在毛伯求金之後若有甚不得已者其為慢上無君可見矣天王

崩何以或書葬或不書葬蓋周以葬期告魯與魯遣使會葬則書之不然不書也

晉人殺其大夫先都

晉靈公幼政在趙盾大夫死者三人由盾之專殺也  
三月夫人姜氏至自齊晉人殺其大夫士穀及箕鄭父  
楚人伐鄭公子遂會晉人宋人衛人許人救鄭夏狄侵  
齊秋八月曹伯襄卒

九月癸酉地震

震動也地靜為常而動為異也或謂震者戰而非動如漢天鳳三年詔云地有動有震震者有害動者不害是震與動異也曰非也動甚為戰戰生於動爾豈可岐而二之哉

冬楚子使椒來聘

案左氏范山言於楚子曰晉君少不在諸侯北方可圖也於是出師以伐鄭遣使以聘魯以此見自古強鄰未嘗不竊伺敵國之衰而肆其志也書所謂無怠

無荒四夷來王信矣哉

秦人來歸僖公成風之襚

仲子惠公之嬖成風僖公之母也仲子繫之惠公可也成風繫之僖公何哉蓋以仲子為妻者惠公也故曰惠公仲子以母成風為夫人者僖公也故曰僖公成風因仲子成風以見惠僖之過也然惠不能正家而乖庶嫡之分僖欲厚其母而不節以禮鈞是二者則惠之過甚於僖矣衣服曰襚所以送死者成風既

葬五年而秦始歸襚不及事矣此又以見秦人之失禮也

葬曹共公

十年春王三月辛卯臧孫辰卒

夏秦伐晉

此年秦伐晉成三年鄭伐許昭十二年晉伐鮮虞皆脫人字如夏五闕月是也說春秋者皆云不稱人狄之也抑不思春秋諸侯舉無道之師以伐人者衆矣



孰非可狄者何獨是耶宣二年秦伐晉猶此年伐晉也而以秦師書成四年鄭伐許猶三年伐許也而以鄭伯書定四年晉伐鮮虞猶昭十二年伐鮮虞也而以晉士鞅衛孔圉書何為而不狄之哉此可以見其說之窮矣

楚殺其大夫宜申自正月不雨至于秋七月及蘇子盟于女栗冬狄侵宋楚子蔡侯次于厥貉

十有一年春楚子伐麋夏叔彭生會晉卻缺于承匡秋

曹伯來朝公子遂如宋狄侵齊

冬十月甲午叔孫得臣敗狄于鹹

經書敗狄于鹹猶書敗狄于箕敗狄于交剛者惡詐戰也明中國不以信義服夷狄而區區挾詐以勝之也經書狄三有曰狄曰赤狄曰白狄未嘗有所謂長狄者長狄之名起于左氏釋鹹之戰云獲長狄僑如於是公穀二傳因之遂有橫身九畝之說大而異之之論其後劉向又指以為晉齊魯三國篡弑之證可

謂誣矣此聖人所以不語怪也

十有二年春王正月郕伯來奔杞伯來朝

二月庚子子叔姬卒

子叔姬者公之子未嫁者也卒而書者已許嫁而待以成人之禮也

夏楚人圍巢秋滕子來朝秦伯使術來聘冬十有二月戊午晉人秦人戰于河曲

季孫行父帥師城諸及鄆

城其國邑宜無待於帥師也行父帥師以城諸鄆何也歟於義也案莊二十九年城諸及防則知諸魯地也襄十二年莒人伐我東鄙圍台季孫宿帥師救台遂入鄆則知鄆莒邑也莒邑而魯城之是城非其所之地也城非其所有而慮莒必爭於是乎將兵以往焉故曰歟於義也其後城成郛至於帥師者蓋懼齊之強猶有說也若城啓陽雖魯之地亦帥師而往者蓋欲務廣地於封疆之外故借兵力以威其鄰也

是亦歎於義故也

十有三年春王正月夏五月壬午陳侯朔卒邾子遽蒞卒自正月不雨至于秋七月

### 大室屋壞

書大室屋壞者明不當壞而壞也文公怠禮荒政不足以承宗廟之祀或者陰譴所形乎唐明皇將幸東都而太廟屋壞宰相宋璟蘇頲以為三年喪未終不可巡幸壞壓之變天戒也請罷東巡修德以答至譴

此即春秋書大室屋壞之義也

冬公如晉衛侯會公于沓狄侵衛十有二月己丑公及  
晉侯盟公還自晉鄭伯會公于棐

自魯仲遂及晉趙盾為衡雍之盟而後文公倡衛  
鄭以從晉凡公盟公會皆仲遂主之爾

十有四年春王正月公至自晉邾人伐我南鄙叔彭生  
帥師伐邾夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸酉

同盟于新城

垂隴之盟士穀主諸侯之盟新城之盟趙盾主諸侯之盟而不以士穀趙盾先諸侯者存君臣之分也

秋七月有星孛入于北斗

孛彗屬也偏指曰彗光芒四出曰孛其言入于北斗者公穀所謂入于魁中是也

公至自會

晉人納捷菑于邾弗克納

晉趙盾以諸侯八百乘納捷菑于邾邾人辭曰齊出  
獲且長趙盾曰辭順而弗從不祥乃還是過而能改  
也何以書曰不知其不可為而為之者過也捷菑欲  
以庶奪嫡是非顯然天下誰不知之盾亦自知之矣  
而慮其不能加諸人也於是借八百乘之力以壓之  
既而屈於邾人之言有終不可以勢力劫者然後退  
聽烏得為改過而無罪哉



九月甲申公孫敖卒于齊

齊公子商人弑其君舍

凡嗣子即位逾年則稱君未逾年則稱子未逾年而稱子者明先君歿未逾年緣孝子之心痛割方新不忍稱君且歲不二君也舍立未逾年而稱君故春秋從而君之所以見舍之非禮焉爾亦猶宣十年齊惠公卒嗣子立未逾年而以爵通於諸侯故春秋亦從而爵之也若夫商人篡弑之惡則不待辨矣

宋子哀來奔

宋子哀者何宋君之子也春秋書君之子曰子如外書子糾子奚齊內書子般子野之類是父雖無道子不可以逃之也子而逃之失子之道矣宋子哀來奔其諸以昭公無道而逃之歟左氏曰高哀非也當以經為斷

冬單伯如齊齊人執單伯齊人執子叔姬

女嫁必待男乃行也子叔姬之嫁也不由逆婦而自

歸于齊失待男之義矣單伯送之尤非禮也齊人既  
執單伯又執子叔姬是必齊以事怒魯故執其使與  
其女以耻魯爾左氏謂子叔姬者齊侯舍之母非也  
經未嘗有他國自囚其國內之人而言執者豈得謂  
之舍母哉今叔姬稱子蓋子者時君之女方嫁齊明  
矣

十有五年春季孫行父如晉

三月宋司馬華孫來盟

書司馬華孫惡世卿也

夏曹伯來朝

齊人歸公孫敖之喪

公孫敖棄君命而從己氏以自絕於其國罪之大者也今其卒喪皆書于冊若不以罪去國者此可見君弱臣強雖大夫有大罪而罰不能加也

六月辛丑朔日有食之鼓用牲于社單伯至自齊晉郤缺帥師伐蔡戊申入蔡秋齊人侵我西鄙季孫行父如

晉冬十有一月諸侯盟于扈十有二月齊人來歸子叔姬齊侯侵我西鄙遂伐曹入其郭

十有六年春季孫行父會齊侯于陽穀齊侯弗及盟  
夏五月公四不視朔

視朔者朔日視朝也朔者一月之始也朔不視朝則  
一月廢朝可知矣書夏五月公四不視朔以見文公  
自正月至五月廢朝也

六月戊辰公子遂及齊侯盟于鄆丘秋八月辛未夫人

姜氏薨

毀泉臺

公羊子曰泉臺者郎臺也先君為之已毀之蓋臆說  
爾若實是郎臺而經何以謂之泉臺乎左氏載有蛇  
自泉宮出入其國秋八月辛未聲姜薨毀泉臺蓋魯  
以泉臺蛇妖所出而壞之也善乎魯申繻有言曰妖  
由人興也人無釁焉妖不自作人棄常則妖興今文  
公不知修德以弭之顧乃歸咎於土木之無知而毀

之豈不惑哉故書曰毀泉臺言非勝不祥之道也

楚人秦人巴人滅庸

冬十有一月宋人弑其君杵臼

春秋不名弑君之賊者有二或賤而不足名也或衆而難於定名也宋昭公不能其大夫至于君祖母以及國人而見弑焉蓋衆而難於定名也

十有七年春晉人衛人陳人鄭人伐宋

左氏載諸侯之大夫伐宋討曰何故弑君既而立文

公而還故春秋書曰晉人衛人陳人鄭人伐宋明不能討賊也或曰宋昭公不道不能其大夫至于君祖母以及國人而見弑焉禍由已召雖不討賊不亦可乎曰不然昔紂為不道武王起而伐之應天順人之舉也而伯夷非之孔子曰伯夷叔齊古之賢人也而謂武未盡善明君臣之義不以無道廢也

夏四月癸亥葬我小君聲姜齊侯伐我西鄙六月癸未公及齊侯盟于穀諸侯會于扈秋公至自穀冬公子遂



如齊

十有八年春王二月丁丑公薨于臺下

薨于臺下非其所也

秦伯瑩卒

夏五月戊戌齊人弑其君商人

春秋篡弑之賊如魯桓齊懿蔡侯般楚子虔之類雖幸免於王法之誅而卒受殺身之禍豈非天網不漏其以此始者必以此終歟弑商人者不名蓋賤者也

六月癸酉葬我君文公

秋公子遂叔孫得臣如齊冬十月子卒

案左氏文公二妃敬嬴生宣公敬嬴嬖而私事襄仲  
宣公長而屬諸襄仲仲見于齊侯而請之齊侯新立  
而欲親魯許之冬十月仲殺太子惡及視而立宣公  
仲之立宣因交通宮廋奪正而與邪也故書曰子卒  
子者未踰年之君也不言弑內辭也上書公子遂叔  
孫得臣如齊則賊可見矣故曰作春秋而亂臣賊子

懼

夫人姜氏歸于齊

夫人姜氏文公之妻太子惡及視之母也惡視既為  
仲遂所殺姜氏不勝其痛棄魯而歸齊觀其將行哭  
而過市市人皆哭此其情豈不大可哀哉春秋書姜  
氏歸于齊歸齊云者言不復返魯也此所以見文公  
用一仲遂致貽身後之禍不能保其妻子如此然則  
有國家者可不選任忠賢俾輔于後嗣哉

季孫行父如齊莒弑其君庶其

春秋通說卷七

欽定四庫全書

覆校官編修臣項家達

校對官庶吉士臣許兆椿

謄錄監生臣李憲滋

欽定四庫全書薈要

經部

春秋通說卷八

九



欽定四庫全書薈要卷一千四百八十九

經部

春秋通說卷八

宋 黃仲炎 撰

宣公

  
元年春王正月公即位

公子遂如齊逆女三月遂以夫人婦姜至自齊

宣之遂猶桓之翬也或曰譏喪娶或曰譏不親迎其  
猶放飯流歆而問無齒決者乎

夏季孫行父如齊

世謂季孫行父家無私積魯之忠臣也今觀春秋書季孫行父如齊則是附姦黨惡之輩豈得謂之忠臣哉仲為不道殺嫡立庶舉魯國之人皆疾之使行父而忠於魯必以死爭之矣今不惟不能爭又且翼成其事當宣公篡立之初則為之納賂於齊以請會如其所為是亦一仲遂爾其後仲遂既死宣公既薨懼公孫歸父之害已而後號之人曰使我殺嫡立庶以



失大援者仲也夫嗚呼當其時不能治也而嘆息於  
易世之後其將誰欺然則其家無私積者猶公孫宏  
之布被焉爾

晉放其大夫胥甲父于衛

放流放之也書曰放驩兜于崇山是也晉放其大夫  
胥甲父于衛放無罪也

公會齊侯于平州公子遂如齊六月齊人取濟西田  
春秋之亂至於篡弑紛紛者無他焉由王室不競而

強大之邦力可以討賊者苟於貪賂而不顧也自強  
大之邦苟於貪賂而不顧使世之亂臣賊子得以賂  
免於是篡弑之禍始接踵於天下矣故許田入鄭而  
桓篡成郕鼎入魯而督罪釋濟西入齊而宣位定春  
秋備書于冊以見利賂之禍如此其極使為人上者  
必務禁絕之而後亂臣賊子有所懼而不敢動於惡  
矣

秋邾子來朝

邾自僖文之世常與魯抗今宣篡立而反朝之非畏  
魯乃畏齊也齊悅魯之利邾畏齊之壓而公論不復  
存矣此所以為春秋之亂也

楚子鄭人侵陳遂侵宋晉趙盾帥師救陳宋公陳侯衛  
侯曹伯會晉師于棐林伐鄭

冬晉趙穿帥師侵崇

崇秦之與國也左氏載晉欲求成於秦趙穿曰我侵  
崇秦急崇必救之吾以求成焉冬趙穿侵崇秦弗與

成夫機心一動鷗鳥高飛況於人乎秦弗與成是晉人以詐失之也

晉人宋人伐鄭

二年春王二月壬子宋華元帥師及鄭公子歸生帥師戰于大棘宋師敗績獲宋華元秦師伐晉夏晉人宋人衛人陳人侵鄭

秋九月乙丑晉趙盾弑其君夷臯

左氏載孔子曰宣子古之良大夫也為法受惡惜也

越竟乃免說者多從之謂弑君者穿而非盾也盾之不幸特以亡不越竟反不討賊受此名爾不知非孔子之言也夫春秋以弑君名趙盾者豈以天下至惡之名而加之無罪之人哉蓋趙穿之弑實趙盾主之也朱氏論此謂如司馬昭之弑高貴鄉公雖非昭自下手而所以使賈充成濟之徒抽戈用命者昭也謂非昭弑可乎觀弑靈之後宣子復使趙穿逆公子黑臀于周而立之蓋盾之於穿豈特不討而已又且使



之援立新君以固其位觀此則穿之弑非盾使之而誰也夫內蓄不臣之謀而外為掩覆之迹當時之人有不能盡知者而春秋必察焉以正其名則無所逃罪矣故曰作春秋而亂臣賊子懼

冬十月乙亥天王崩

三年春王正月郊牛之口傷改卜牛牛死乃不郊猶三望魯郊僭禮也郊牛之口傷改卜牛牛死是於僭禮之中又知天意之不亨也

葬匡王

楚子伐陸渾之戎

楚子伐陸渾之戎遂至于雒觀兵于周疆蓋名為伐  
戎實在偏周也

夏楚人侵鄭秋赤狄侵齊宋師圍曹冬十月丙戌鄭伯  
蘭卒葬鄭穆公

四年春王正月公及齊侯平莒及郟莒人不肯公伐莒  
取向

孟子曰愛人不親反其仁治人不治反其智禮人不  
答反其敬行有不獲者皆反求諸已其身正而天下  
歸之魯宣公挾齊侯以平莒郟之爭而莒人不肯是  
行有不獲者反求諸已可也怒而伐之然且不可況  
因以為利乎公伐莒取向蓋負販小人之所羞為也  
秦伯稻卒

夏六月乙酉鄭公子歸生弑其君夷

陸淳云子公弑君之賊其惡易知子家縱其為逆罪



莫大焉故書為首惡也是不然觀左氏鄭靈公食大  
夫黿召子公而弗與子公怒染指於鼎嘗之而出公  
怒欲殺子公子公與子家謀先子家曰畜老猶憚殺  
之況君乎反譖子家子家懼而從之夏弑靈公子家  
即歸生也方子公與子家謀先子家未可則弑未成  
及子家既從則弑遂成是成弑君之事全在子家豈  
止於縱人為逆也哉然鄭靈公不以禮遇其臣至於  
食大夫黿召子公而弗與以激其怒又自怒而欲殺

之為君如此雖欲無亂亦不可得已

赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆叔姬  
左氏載春公如齊高固使齊侯止公請叔姬焉秋高  
固來逆女自為也夫人所以能自立於天地間者義  
而已矣苟為不義則自視歉然惟人之畏百骸四體  
豈復我有哉觀魯宣公以不義得國倚強齊以自固  
土田薦賄玉帛造庭舉千乘之國惟齊是聽今遂見

偏于齊連昏於齊之大夫而不敢違焉此孟子所謂  
人役者也

叔孫得臣卒

冬齊高固及子叔姬來

齊高固脅娶魯女而挾以歸寧魯國之恥也

楚人伐鄭

六年春晉趙盾衛孫免侵陳夏四月秋八月螽冬十月  
七年春衛侯使孫良夫來盟夏公會齊侯伐萊秋公至

自伐萊大旱

冬公會晉侯宋公衛侯鄭伯曹伯于黑壤

黑壤之會晉人止公以賂免焉蓋宣為不義不特齊人得以無道加之而晉人亦得以無道加之也

八年春公至自會

夏六月公子遂如齊至黃乃復

公孫敖如京師不至而復是無故而廢君命者惡而書之宜也公子遂如齊至黃有疾乃復是有故而返

者何以書曰人臣奉命而出雖有疾不當復也有疾而自復猶無君命也禮未致事而死以尸將事

辛巳有事于太廟

或謂春秋書大事為禘祫有事為烝嘗非也烝嘗四時之常祭故春秋書丁丑烝乙亥嘗不曰于某宮于某廟也惟三年一大祭故禘于太廟或書大事于太廟其實一也案春秋閏以二年八月薨僖二年當除喪為大祭至五年再大祭八年三大祭故經於僖八

年書禘于太廟是也文十八年二月薨宣二年當除喪為大祭至五年再大祭八年三大祭故經於宣八年書有事于太廟是也豈得謂之烝嘗也哉

仲遂卒于垂壬午猶繹萬入去籥

辛巳有事于太廟既卒事矣聞卿佐之喪可以無繹而繹猶不廢至於萬舞惡其聲聞而去籥焉是知其不可為而為之也所以見宣公薄卿佐之喪也雖然仲遂不道之臣也死而免於戮而見薄於君宜也何

以書曰仲遂久專國柄作威作福雖宣公為仲遂所  
立而卒不能堪焉於其生也忌之於其死也幸之故  
書曰仲遂卒于垂壬午猶繹明宣公無悲感之心者  
由仲遂專國之所致也此所以戒人臣也戴記檀弓  
仲遂卒于垂壬午猶繹仲尼曰非禮也卿卒不繹此  
漢儒所傳爾卿卒不繹禮之常者也若夫春秋書之  
意有不止此者非漢儒所能盡傳也繹者祭之明日  
享為尸之人及凡執事助祭之人也穀梁子謂祭之

旦日享賓是也在商謂之彤在周謂之繹萬者舞之  
摠名也武舞用干戚文舞用羽籥

戊子夫人嬴氏卒晉師白狄伐秦楚人滅舒蓼秋七月  
甲子日有食之既

冬十月乙丑葬我小君敬嬴雨不克葬庚寅日中而克  
葬

喪事有進而無退凡葬未啟殯日雖吉而遇雨止可  
也若既啟殯不為雨止矣然則冒雨乎曰喪禮有所



謂潦車蓑笠者蓋備雨有具也今遇雨止無備可知  
矣春秋書雨不克葬惡薄其親也

城平陽楚師伐陳

九年春王正月公如齊公至自齊夏仲孫蔑如京師齊  
侯伐萊秋取根牟八月滕子卒九月晉侯宋公衛侯鄭  
伯曹伯會于扈晉荀林父帥師伐陳辛酉晉侯黑臀卒  
于扈冬十月癸酉衛侯鄭卒宋人圍滕楚子伐鄭晉卻  
缺帥師救鄭

陳殺其大夫洩冶

左氏載陳靈公與孔寧儀行父通於夏姬皆衷其相服以戲于朝洩冶諫曰公卿宣淫民無則焉公告二子二子請殺之公弗禁遂殺洩冶孔子曰詩云民之多辟無自立辟其洩冶之謂乎此非孔子之言也昔者紂為不道微子去之箕子為之奴比干諫而死孔子曰殷有三仁焉以比干為仁則必不以洩冶為非矣邦無道危行言孫此世之明哲見幾不仕而高尚

者之為也若夫有位于朝食君之祿則既以身許國  
矣豈可緘默苟容與俗俱靡以自立辟為戒以善保  
身為得哉此非所以為人臣之訓也雖然春秋書陳  
殺其大夫洩冶非以罪洩冶也所以見君殺諫臣未  
有不喪亡者也是故桀殺龍逢而夏亡紂殺比干而  
殷亡觀洩冶見殺其明年靈公弑又明年楚遂縣陳  
可為後世明戒矣

十年春公如齊公至自齊

齊人歸我濟西田

奴顏事齊致其悅以歸田可耻也已

夏四月丙辰日有食之己巳齊侯元卒

齊崔氏出奔衛

其曰崔氏惡世官也

公如齊五月公至自齊癸巳陳夏徵舒弑其君平國六月宋師伐滕公孫歸父如齊葬齊惠公晉人宋人衛人曹人伐鄭秋天王使王季子來聘公孫歸父帥師伐邾

取繹大水季孫行父如齊冬公孫歸父如齊

齊侯使國佐來聘

齊惠公卒嗣子立未踰年而以爵通於諸侯當凶豐而行吉禮無君臣父子之義矣

饑楚子伐鄭

十有一年春王正月夏楚子陳侯鄭伯盟于辰陵公孫歸父會齊人伐莒秋晉侯會狄于欒函

冬十月楚人殺陳夏徵舒

此討賊也何以書權在楚人也

丁亥楚子入陳納公孫寧儀行父于陳

公孫寧儀行父者陳大夫之與其君淫使其君見弑者也楚子不討而反納之其殆二臣許以陳輸楚故使之為鄉導歟

十有二年春葬陳靈公楚子圍鄭

夏六月乙卯晉荀林父帥師及楚子戰于邲晉師敗績孔子荅季路三軍孰與之問曰暴虎馮河死而無悔

者吾不與也必也臨事而懼好謀而成者也蓋用兵  
臨敵不貴乎徒勇而貴乎能懼徒勇而不能懼則不  
量彼已之勢不度可否之宜嘗試一擲其能戰勝鮮  
矣又易之師曰長子帥師弟子輿尸凶凡主帥而不  
能制命亦未有不敗者也晉景公繼靈成之後霸業  
不競諸侯解體楚雖夷狄而君明臣良兵鋒四克彼  
已強弱之勢亦可想見今楚方圍鄭鄭遂降楚晉人  
救之已無及矣當時晉大夫如士會荀首皆知楚之

未易敵而不欲戰惟先穀耻於避楚以中軍佐先濟  
于河荀林父實主中權無所節制始欲斂兵而卒不  
果也蓋先穀狃於徒勇而不能懼林父奪於輿尸而  
不能決犯馮河之戒失長子之職則其喪師于邲不  
亦宜哉

秋七月冬十有二月戊寅楚子滅蕭晉人宋人衛人曹  
人同盟于清丘

宋師伐陳衛人救陳



陳附楚者也宋以清丘之盟而伐之衛背盟而救之  
伐者義而救者不義矣然宋以附庸之蕭見滅於楚  
不勝其憤楚之私而洩其怒於陳非實為中國伸其  
義也

十有三年春齊師伐莒夏楚子伐宋秋螽冬晉殺其大  
夫先穀

十有四年春衛殺其大夫孔達夏五月壬申曹伯壽卒  
晉侯伐鄭秋九月楚子圍宋蔡曹文公冬公孫歸父會

齊侯于穀

十有五年春公孫歸父會楚子于宋

自晉霸不競而楚爭諸侯於是伐陳而陳服討鄭而鄭降圍宋而宋請平往往駢首南向者不止此矣然陳亂無君而楚來討賊國人皇皇惟命是聽固不足責至如鄭宋被圍初皆闔城拒守綿歷時月力不能支然後請服此亦有不得已者獨魯不然方楚子在宋兵未及魯而望風納賄惟恐或後是以有穀之會

焉此可見魯君大夫苟免自營怵於威武之甚矣  
夏五月宋人及楚人平六月癸卯晉師滅赤狄潞氏以  
潞子嬰兒歸秦人伐晉

王札子殺召伯毛伯

按左氏王孫蘇與毛伯召伯爭政使王子捷殺召戴  
公及毛伯衛子捷即札子也威福君之大柄廉耻國之  
大維今子弟專殺是君無威福之柄也朝臣爭政是國  
無廉耻之維也君無柄國無維所以為東周之衰亂也

秋螽仲孫蔑會齊高固于無婁

初稅畝

古者井田八家皆私百畝其中為公田八家耕之以奉其上所謂藉也藉之為言借也借民力為之而非稅也今魯初稅畝是於公田之外又稅其私畝也孔子曰始作俑者其無後乎壞井田之制開厚歛之門使民不聊生國無善治蓋自是始矣

冬蠲生

螽始生者為蝻螽蜚蔽天或來自他處不必見其生也故不曰螽生蝻生於境內見其生也故曰蝻生左氏公羊皆云不為灾非也凡物不為害不書周之冬夏之秋也秋稼結實而蝻生敗之豈得不為害哉

# 饑

春秋書饑者凶荒之甚者也莊公二十八年大無麥禾亦饑歲也而不言饑蓋當時雖無素備然猶知告糴于齊以為凶荒之救故其民猶未至於流亡也今

宣公歲饑見於再書者是其國既無蓄積之備又無救荒之策坐視其民之飢而死爾蓋必如詩所謂饑饉降喪民卒流亡孟子所謂凶年饑歲老弱轉乎溝壑壯者散而之四方者矣故春秋以饑書也嗚呼使民至此烏在其為民父母哉

十有六年春王正月晉人滅赤狄甲氏及留吁

昔者聖王之待夷狄也蓋有道矣於其來也接之而不傷義於其叛也討之而不傷仁肅慎來賀王命賄

之無過禮也故曰接之而不傷義薄伐獫狁至于太原不窮追也故曰討之而不傷仁春秋霸者始異乎此方其致夷狄之親附則屈意奉承周旋無間如晉侯會狄于欒函是也及乘其衰亂則窮追深入殄滅無遺如晉師滅赤狄潞氏晉人滅赤狄甲氏及留吁是也斯二者皆非所以為待夷狄之道故春秋書之以為戒也

夏成周宣榭火

臺望氛祥榭講軍實成周之地有宣榭者興王之遺迹也宣王承幽王之後中國衰弱夷狄侵陵於是脩車馬備器械南征北討中興王業其用武於四方則必有講肄之所即成周宣榭是也宣榭火興王之迹泯矣故聖人重之而書示不忘古也千載而下尚有悲石鼓文字之磨滅如韓愈氏歌詩者不亦春秋意乎

秋郊伯姬來歸



郊伯姬來歸出也讀詩至葛覃則知婦人事君子之本苟失斯道至於孤睽宜矣故書以戒婦人也

冬大有年

十有七年春王正月庚子許男錫我卒丁未蔡侯申卒夏莫許昭公葬蔡文公六月癸卯日有食之己未公會晉侯衛侯曹伯邾子同盟于斷道秋公至自會

冬十有一月壬午公弟叔肝卒

公弟叔肝者公弟之為大夫者也大夫卒故書也其

曰公弟猶曰公子也以先君之子稱之故曰公子以  
今君之兄弟稱之故曰公弟所以書者用見魯之大  
夫皆公族為之爾左氏謂凡稱弟皆母弟非也同先  
君之氣類即為兄弟豈得以同母稱弟異母不稱弟  
哉此非聖人之教也程氏謂先儒說母弟者蓋緣禮  
有立嫡子同母弟之文其曰同母蓋為嫡爾非以為  
加親也

十有八年春晉侯衛世子臧伐齊公伐杞夏四月秋七

月邾人戕鄫子于鄫

甲戌楚子旅卒

吳楚之君不書葬者避其君僭號尊王室存中國也  
其以子稱者從本爵也

公孫歸父如晉冬十月壬戌公薨于路寢歸父還自晉  
至笙遂奔齊

歸父襄仲之子宣公之黨故聞宣公薨而遂奔齊也  
奔齊而不奔喪無君臣之義矣禮人臣受命在外聞

君薨畢事則奔喪未畢則為位而哭

春秋通說卷八

欽定四庫全書薈要卷一千四百九十

經部

春秋通說卷九

宋 黃仲炎 撰

成公

元年春王正月公即位二月辛酉葬我君宣公無冰  
三月作丘甲

作丘甲者杜預以為周制甸出甲士三人今魯使丘  
出之是丘出甸賦也孫覺氏非之以為丘出甸賦丘

豈能供之哉魯成雖暴刻不應頓取於人如此之暴也蓋古者四邑為丘四丘為甸一甸之地兼有四丘而出長轂一乘戎馬四疋牛十頭甲士三人步卒七十二人成公始作丘甲則是丘出一甲而甸出甲士四人也往者三人今增其一丘出一人焉爾從孫氏之說則是一甸之地甲士一人則百甸所增者百人爾然魯將伐齊故作丘甲鞏之戰四卿並將蓋前此所未有也其勢必大益兵度其苛賦於民者不止於

一甸增一甲士也夫仁人之為國也不虛內以事外  
不困民以奉敵不仁者反是貪戰勝攻取則增賦益  
兵於是民不勝憊矣孟子曰我能為君約與國戰必  
克今之所謂良臣古之所謂民賊也蓋言貪戰之必  
克則增賦益兵使民不堪命非民賊而何民賊者魯  
成公與四卿當之矣可不戒哉或謂丘出甸賦則什  
賦三四矣何至哀公時方有二猶不足之嘆耶曰魯  
為伐齊故作丘甲一時暴民非必以為常也惟初稅

畝用田賦為常制爾故作丘甲不言賦

夏臧孫許及晉侯盟于赤棘

秋王師敗績于茅戎

按左氏晉侯使瑕嘉平戎于王單襄公如晉拜成劉康公徼戎遂伐之敗焉蓋既平戎又徼而伐之乘其不備也王者不以信義待夷狄而挾詐以僥倖正使成功亦不足貴已矧喪師乎故書曰王師敗績于茅戎過在王師也其不言戰而以自敗為文者明至尊



無敵之義也

冬十月

二年春齊侯伐我北鄙夏四月丙戌衛孫良夫帥師及齊師戰于新築衛師敗績

六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞌齊師敗績

晉卻克切齒於婦人一笑之辱遂伐齊以洩其忿鞌

之戰蓋晉大夫專權逞忿之兵也魯衛曹皆從霸令者也然魯獨以四卿會之何哉魯自季友卒政歸仲氏宣公薨歸父奔齊故四卿專政而懼歸父因齊以入也於是併力挫齊始分公室而不相下故輿尸之也

秋七月齊侯使國佐如師己酉及國佐盟于爰婁

楚屈完來盟于召陵不稱使見楚子之不屈也夷狄強也齊國佐來盟于爰婁稱齊使見齊侯之屈也大

夫強也

八月壬午宋公鮑卒庚寅衛侯速卒

取汶陽田

爰婁之盟晉人使齊返魯衛之侵地故魯取汶陽田  
還舊地也還舊地正也何以書惡由諸大夫之力取  
之也

冬楚師鄭師侵衛十有一月公會楚公子嬰齊于蜀  
丙申公及楚人秦人宋人陳人衛人鄭人齊人曹人邾

人薛人鄆人盟于蜀

左氏謂蜀之盟卿不書賁盟也於是畏晉而竊與楚盟曰賁盟非也楚自得志于邲橫行於中國諸侯之不附楚者蓋鮮矣今其號召列國之君臣羣至于蜀而公然為之盟主而列國之君臣亦公然受楚之盟是豈謂之畏晉而竊盟哉使列國竊與楚盟而晉莫之知亦可謂塗塞耳目之甚矣

三年春王正月公會晉侯宋公衛侯曹伯伐鄭辛亥葬

衛穆公二月公至自伐鄭

甲子新宮災三日哭

新宮者三傳皆謂宣公新主入廟故曰新宮非也春秋書先君之宮未有不書謚者曰丹桓宮立煬宮有事于武宮之類是也若曰先公新主之廟故謂之新宮則閔二年吉禘于莊公文二年躋僖公者可謂新主矣何以不曰新宮而曰莊公僖公哉由此觀之則知新宮非宣宮明矣春秋於土木之功踰越舊制者

則以新言之如新延廢新作南門新作雉門及兩觀是也魯成狃於戰鞏之勝侈欲橫生於是別為新宮如晉之築虎祁者怨讟動於民則天火之故曰新宮災明非舊制也所以為後世人君崇侈宮室者之戒也昭十八年鄭災三日哭國不市蓋為國與民哭之也今新宮災失侈欲之奉何哭之有故書曰三日哭言不當哭也檀弓以新宮為先君之宮三日哭為得禮蓋漢儒公三傳之訛說爾

乙亥葬宋文公夏公如晉鄭公子去疾帥師伐許公至  
自晉

秋叔孫僑如帥師圍棘

汶陽魯故地棘汶陽邑也昔奪於齊今歸於魯則其  
故邑人民宜懷其舊主願附於魯也今棘乃不服至  
勤用師以圍之何哉胡氏謂魯於是初稅畝作丘甲  
賦役繁重棘雖復舊而不願為之氓也成公不知行  
仁政去苛征以起人願附之心而區區恃兵威以加

之則其叛自若也他日汶陽之田復歸于齊雖出於  
晉侯之命然亦其人民攜叛魯不得而留之爾有國  
家者可不戒哉

大雩晉卻克衛孫良夫伐廐咎如冬十有一月晉侯使  
荀庚來聘衛侯使孫良夫來聘丙午及荀庚盟丁未及  
孫良夫盟鄭伐許

四年春宋公使華元來聘三月壬申鄭伯堅卒杞伯來  
朝夏四月甲寅臧孫許卒公如晉葬鄭襄公秋公至自



晉冬城鄆鄭伯伐許

五年春王正月杞叔姬來歸

杞叔姬見出而來歸猶郊伯姬也

仲孫蔑如宋夏叔孫僑如會晉荀首于穀

梁山崩

易之剥象曰山附於地剥山足朽壤下剥上也是為陰陷陽臣逼君之象當春秋時諸侯僭天子大夫僭諸侯弑君亡國累累而見是則梁山崩不為無所自

致矣梁山晉地也

秋大水冬十有一月己酉天王崩十有二月己丑公會  
晉侯齊侯宋公衛侯鄭伯曹伯邾子杞伯同盟于蟲牢  
六年春王正月公至自會

二月辛巳立武宮

周不毀廟三后稷文武魯不毀廟二周公伯禽若武  
公於魯為十一世祖而非始封之君世遠當遷久矣  
而復立武宮非禮可知也

取鄆衛孫良夫帥師侵宋夏六月邾子來朝公孫嬰齊  
如晉壬申鄭伯費卒秋仲孫蔑叔孫僑如侵宋楚公子  
嬰齊帥師伐鄭冬季孫行父如晉晉欒書帥師救鄭  
七年春王正月麇食郊牛角改卜牛麇鼠又食其角  
乃免牛

魯郊僭禮也麇鼠食郊牛角者再是於僭禮之中又  
慢而不以誠也

吳伐鄭

楚之始見也曰荆敗蔡吳之始見也曰吳伐郟其不以爵氏人名稱者雖春秋貶吳楚之法然亦以見其勢之猶微也方其勢之猶微使為中國者能深思遠慮抑遏其鋒則用力不難而遺禍不烈矣奈何楚之始見也當齊桓之初霸方欲養其患以張己之功吳之始見也當晉景之不競方欲資其力以為己之助於是涓溜不塞而成川爝火不撲而燎原其始事也簡其將畢也巨故吳楚之禍至於盟宋盟黃池此豈

一朝夕之故哉。易坤之初六曰：履霜，堅冰至。蓋言順也。由辨之不早辨也。聖人於易示其象於春秋，著其事所以為諸夏之戒明矣。

夏五月，曹伯來朝，不郊。猶三望。秋，楚公子嬰齊帥師伐鄭。公會晉侯、齊侯、宋公、衛侯、曹伯、莒子、邾子、杞伯，救鄭。八月戊辰，同盟于馬陵。公至自會。

吳入州來

州來，楚邑也。晉通吳於中國，而資之以撓楚，故吳為

之入州來也他日吳為中國之患有甚於楚者蓋自  
晉之通吳始矣

冬大雩衛孫林父出奔晉

八年春晉侯使韓穿來言汶陽之田歸之于齊

說者謂春秋書晉侯使韓穿來言汶陽歸齊者惡予  
奪之不常焉爾此非至論也夫制命之道義為大信  
次之義立而後可信也非義而信不可也使汶陽本  
齊之地而晉昔也劫而與魯今也命之歸齊謂之改

過遷善可也豈得以與奪不常罪之惟汶陽本魯之舊既用師於齊而歸之魯矣於義不當復奪而與齊此韓穿來言所以必書於春秋也此論不明則恐世之為政者知戒夫與奪之不常而不以義權之則必有執過遂非之患矣

晉欒書帥師侵蔡公孫嬰齊如莒宋公使華元來聘夏宋公使公孫壽來納幣晉殺其大夫趙同趙括秋七月天子使召伯來錫公命冬十月癸卯杞叔姬卒

晉侯使士燮來聘

晉士燮來聘蓋役魯以伐邾也凡假聘以役諸侯不得為有禮故書

叔孫僑如會晉士燮齊人邾人伐邾

吳伐邾不能救邾事吳輒伐之故不救為不忠伐為不恕

衛人來媵

媵常事也何以書禮天子求后於諸侯王后歸于京



師以姪娣從三國往媵之亦以姪娣從故一娶十二女諸侯嫁女于諸侯以姪娣從二國往媵之亦以姪娣從故一娶九女今魯嫁女于宋而三國媵之故書也夫為國君者妾媵不具固無以廣嗣然多而無節亦非禮已是以妾媵過多則費用廣而財匱御幸踈而怨興嬖寵乘而政亂故春秋來媵不書而三國來媵則書之所以明妾媵過多為後世戒也嗚呼使此義明則後世人主安有掖庭數千人如晉武帝之淫

侈者哉

九年春王正月杞伯來逆叔姬之喪以歸

叔姬為杞伯所出義與杞絕矣禮女嫁未三月而死猶歸葬於女氏之黨豈有生而出死而返葬乎杞伯來逆叔姬之喪以歸杞非禮矣杞伯逆叔姬之喪以歸而魯從之魯亦非禮也

公會晉侯齊侯宋公衛侯鄭伯曹伯莒子杞伯同盟于蒲公至自會

二月伯姬歸于宋

明不待親迎而行也

夏季孫行父如宋致女

禮嫁人既嫁三月而後父母使人安之謂之致女致女常事也何以書嫌使卿致也

晉人來媵

秋七月丙子齊侯無野卒晉人執鄭伯晉欒書帥師伐鄭冬十有一月葬齊頃公

楚公子嬰齊帥師伐莒庚申莒潰楚人入鄆

春秋書被伐而潰者明不能固結其民心程子曰人君之道以民心悅服為本故雖率之以犯難則効死而不去夫能使民効死而不去豈有逃其上而潰者哉左氏謂莒城惡而潰楚遂入鄆非知本之論也

秦人白狄伐晉鄭人圍許城中城

十年春衛侯之弟黑背帥師侵鄭夏四月五卜郊不從乃不郊五月公會晉侯齊侯宋公衛侯曹伯伐鄭齊人

來賂丙午晉侯孺卒秋七月公如晉冬十月

十有一年春王三月公至自晉晉侯使卻曄來聘己丑  
及卻曄盟夏季孫行父如晉

晉人止公九月而後歸之然猶亟於聘魯者豈復有  
親魯之意哉疑其叛而要結之也魯侯被晉之辱然  
猶繼朝而聘晉者豈復有德晉之心哉畏其威而諂  
事之也晉以要結為信魯以諂事為禮二者皆小人  
之相與焉爾

秋叔孫僑如如齊冬十月

十有二年春周公出奔晉夏公會晉侯衛侯于瑣澤秋  
晉人敗狄于交剛冬十月

十有三年春晉侯使卻錡來乞師

霸主帥諸侯以討伐之事而諸侯必以師從無待於  
乞師也其乞師者必有迫切之辭如楚申包胥乞師  
于秦曰使下臣告急之類故書曰乞師賤之也

三月公如京師

公如京師者假道于京師也左氏僖三十年秦將襲鄭過周北門左右免胄而下超乘者三百乘鄭商人弦高將市於周遇之以乘韋先牛十二犒師以此觀之秦兵東出必道自周故晉帥東諸侯西向以伐秦亦必假道於周明矣春秋魯十二公而覲天子者二皆不得謂之禮者僖朝于王所成如京師是也僖執朝王之禮而不行於京師則非其所矣成假道于京師因以朝王而意不在朝王矣故皆不得謂之禮也

以其皆不得謂之禮故書

夏五月公自京師遂會晉侯齊侯宋公衛侯鄭伯曹伯  
邾人滕人伐秦

春秋書秦晉之爭所以著二國往來之私憾非關於  
中國大計也左氏載此年晉侯帥諸侯伐秦使呂相  
絕秦其言若可觀而實非也如圍鄭一役晉文欲以  
報私忿爾而挾秦以圍之鄭使燭之武說秦君而秦  
為退師此乃秦君知過而改非可以是咎秦也當是



時子犯請擊之而文公不聽亦理所當然何足以為  
賜而曰有大造於秦哉況晉止及秦圍鄭他無從諸  
侯而曰諸侯疾之將致命于秦如此等語大率皆誑  
秦爾夫奉辭臨敵不出於實而出於誑果何以服敵  
國之心哉

曹伯廬卒于師秋七月公至自伐秦冬葬曹宣公

十有四年春王正月莒子朱卒夏衛孫林父自晉歸于

衛

秋叔孫僑如如齊逆女

春秋內逆女三皆大夫專之也觀翬遂之事則知僑如之事矣

鄭公子喜帥師伐許

九月僑如以夫人婦姜氏至自齊

春秋內大夫或稱族或舍族者以前後一事故後從省文爾如前書叔孫豹及晉趙武楚屈建會于宋故後書豹及諸大夫盟于宋如前書晉人執季孫意如

以歸故後書意如至自晉其稱族舍族者豈復有意  
義存乎其間哉左氏以僑如稱族為尊君命舍族為  
尊夫人者妄也

冬十月庚寅衛侯臧卒秦伯卒

十有五年春王二月葬衛定公

三月乙巳仲嬰齊卒

公之子曰公子公子之子曰公孫公孫之子以王父  
字為仲氏嬰齊者公孫歸父之子公子仲遂之孫以

王父字為氏故曰仲嬰齊也公羊謂仲嬰齊為公孫  
嬰齊以弟後兄者妄矣

癸丑公會晉侯衛侯鄭伯曹伯宋世子成齊國佐邾人  
同盟于戚晉侯執曹伯歸于京師

左氏載曹負芻殺世子自立之事不見於經是未必  
然晉合諸侯既列曹伯於盟而後執之蓋執之必不  
以其罪故書之也觀明年曹人再請曹伯于晉而始  
歸之使曹伯殺世子以自立當不為國人所與何至

再請于晉哉

公至自會夏六月宋公固卒楚子伐鄭秋八月庚辰葬  
宋共公

宋華元出奔晉宋華元自晉歸于宋

左氏載宋司馬蕩澤弱公室殺公子肥於是華元為  
右師曰我為右師君臣之訓師所司也今公室卑而  
不能正吾罪大矣不能治官敢賴寵乎乃出奔晉既  
而左師魚石自止華元于河上請討許之乃反使華

喜公孫師帥國人攻蕩氏殺子山左師二司寇二宰  
遂出奔楚華元使向戌為左師老佐為司馬樂裔為  
司寇以靖國人觀此則華元之志在於強公室靖國  
亂且其出奔即返庶幾於易不遠復無祇悔之義也  
何以書曰即經意攷之如曰華元出奔晉曰自晉歸  
于宋者可以見其結晉霸之援而求得志于其國也  
既得晉援而返國於是殺蕩澤逐五大夫舉宋國慶  
賞刑威之柄惟己之所欲為其所謂強公室者實弱

之所為靖國亂者實亂之也此而不治則世之姦臣  
挾外援以求專其國者皆得借是以逞矣

宋殺其大夫山宋魚石出奔楚

冬十有一月叔孫僑如會晉士燮齊高無咎宋華元衛  
孫林父鄭公子魴邾人會吳于鍾離

殊會者往會之也往會之者尊之而不敢屈致之也  
王世子在首止而諸侯往會之故曰會王世子于首  
止吳在鍾離而諸侯之大夫往會之故曰會吳于鍾

離

許遷于葉

十有六年春王正月雨木冰

周之春正月夏之冬十一月也宜寒而燠非冬時之  
正故春秋以無冰為異而書也至若凝寒之極雖在  
正冬亦為災之象故春秋以雨木冰為異而書也雨  
木冰者雨纔著木即成堅冰寒極可知矣如漢桓帝  
延熹中冬大寒殺鳥獸魚鼈竹柏之葉有枯傷者襄



楷云不出二年天子當之是亦寒極為災也

夏四月辛未滕子卒鄭公子喜帥師侵宋六月丙寅朔  
日有食之晉侯使欒黶來乞師

甲午晦晉侯及楚子鄭伯戰于鄢陵楚子鄭師敗績

自邲之戰中國不振旅而楚遂狎主諸夏之盟終晉  
景之世不能雪此辱也今厲公不煩多助一戰勝楚  
鄢陵之功視城濮有光焉宜聖人與之也何以書曰  
上智謀國者不畏多難而畏無難不憂有敵而憂勝

敵何者世惟賢哲之君能保勝持盈而侈闇之君幸  
有功名可矜無外患可懼鮮不底於喪亡者也左氏  
載鄢陵之戰晉諸大夫皆欲之獨范文子不欲曰吾  
先君之亟戰也有故秦狄齊楚皆強不盡力子孫將  
弱今三強服矣敵楚而已唯聖人能內外無患自非  
聖人外寧必有內憂盍釋楚以為外懼乎既戰楚師  
敗績文子使祝宗祈死曰君驕侈而克敵是天益其  
疾也難將作矣於是厲公反自鄢陵而侈益甚欲盡

去諸大夫而立其左右逾年殺三卻立胥童樂書中  
行偃殺胥童弑厲公國內大亂卒如范文子之所料  
嚮使其不能勝楚恐恐乎敵國外患之來則君臣儆  
懼當不至此矣是知鄢陵之功晉國之禍也故蘇轍  
氏論西晉之亂由於平吳之功以為使吳不亡則晉  
之君臣勵精不懈是吳不滅而晉不亂也羊祜畫平  
吳之策不如范文子先見之明信矣哉

楚殺其大夫公子側

秋公會晉侯齊侯衛侯宋華元邾人于沙隨不見公  
不見公者矜勝楚之功而驕諸侯也其侈益甚不待  
反自鄢陵而後見矣小夫淺人不能居成功者如是  
哉

公至自會

公會尹子晉侯齊國佐邾人伐鄭

尹子王官也其致王官會伐者挾天子以令諸侯也  
曹伯歸自京師

曹伯歸自京師正也何以書蓋晉侯挾天子以令諸侯雖寘曹伯于京師而操縱在己也

九月晉人執季孫行父舍之于茗丘冬十月乙亥叔孫僑如出奔齊十有二月乙丑季孫行父及晉卻曄盟于扈公至自會乙酉刺公子偃

十有七年春衛北宮括帥師侵鄭夏公會尹子單子晉侯齊侯宋公衛侯曹伯邾人伐鄭六月乙酉同盟于柯陵秋公至自會齊高無咎出奔莒

九月辛丑用郊

魯郊僭禮也九月郊非時也用郊又非禮也用郊者以郊為用也蓋諂神以求福爾如後世秦苻堅因王猛疾病特為親祈南北郊之類是也

晉侯使荀瑩來乞師冬公會單子晉侯宋公衛侯曹伯齊人邾人伐鄭十有一月公至自伐鄭壬申公孫嬰齊卒于狸脰十有二月丁巳朔日有食之邾子貜且卒晉殺其大夫卻錡卻犢卻至楚人滅舒庸

十有八年春王正月晉殺其大夫胥童庚申晉弑其君  
州蒲

晉厲公嗣霸數年之間北挫狄于交剛西敗秦于麻  
隧南破楚于鄢陵威名震赫遠過前代而卒以驕侈  
失德致殺身亂國之禍此可為萬世永戒矣故秦并  
六國而二世滅隋一天下而煬帝亡秦苻堅平燕翦  
代而為淝水之敗唐莊宗滅梁下蜀而有嗣源之禍  
李景取閩并楚而有淮南之失故曰有道之主能持

勝信矣左氏載晉欒書中行偃使程滑弑厲公而春秋不名首弑者蓋厲公得罪於諸大夫而弑之者衆首從難分故稱國以弑也

齊殺其大夫國佐公如晉夏楚子鄭伯伐宋宋魚石復入于彭城公至自晉晉侯使士匄來聘秋杞伯來朝八月邾子來朝築鹿囿己丑公薨于路寢冬楚人鄭人侵宋晉侯使士魴來乞師十有二月仲孫蔑會晉侯宋公衛侯邾子齊崔杼同盟于虛打丁未葬我君成公







春秋通說卷九



覆校官編修臣項家達

校對官庶吉士臣閔惇大

膳錄監生臣宋維翰